



Van links: Craig Green, Francois Pretorius, Faan van Wyk, Buks Jordaan, Sean Gothe, Louw Smit, Gideon Brits, Orna van der Merwe, Gerda Viviers, Louise van den Heever, Deon Pagel, Marleen Büre, Hein Schuld, ds. Willie Rothmann, ds. Heinrich Stapelberg, Dries Kunz en Danie Kolver.

Die Gemeenteraad van NG Overkruin het aan die begin van Maart die geleentheid gehad om bymekaar te kom en onself af te vra: Wat is jou ideale kerk en hoe gaan NG Overkruin? Wat 'n ervaring om saam met medegelowiges dieper en eerlik te grawe na die antwoorde. Dit was duidelik, dat alhoewel ons antwoorde mekaar aanvul maar ook verskil, die Heilige Gees ons gelei het om mekaar te hoor en tot 'n bewuswording gelei het dat die uitbou van die Koninkryk die belangrikste is.

Ons is in die bevoorregte posisie dat die geestelike begeleiding van die Gemeente in die bekwame hande van di. Heinrich en Willie is. Hul verantwoordelike Woordbediening begelei ons tydens eredienste, waar gestreef word na harmonie tussen al die elemente van die erediens. Alhoewel aktuele sake aandag kry, mag ons nooit ons Gereformeerde tradisies

verloor nie, maar moet ons ook plek maak vir verskillende spiritualiteit en vernuwe waar nodig. Die vraag wat ons mekaar hieroor kan afvra: Hoe oop is Overkruin se deure? Lets waaraan elke gemeentelid aandag kan gee.

Overkruin streef daarna om 'n Gemeente te wees waar elkeen veilig voel en die vrug van die Gees duidelik sigbaar in elkeen se lewe is. Daar is 'n behoefte vir biddae uitgespreek en die leraarspan sal hieraan aandag gee.

Om 'n diverse gemeente te wees, is nie altyd maklik nie, maar ons glo dat Overkruin al ver gevorder het. Om mekaar se verskille te aanvaar verg harde werk, maar met die leiding van die Heilige Gees kan ons mekaar opbou en versterk. Alhoewel daar sterk gemeentebetrokkenheid is, sal ons graag wil sien dat die jonger geslag meer betrokke raak.

Overkruin het 'n sterk sendingkarakter en ons is betrokke by internasionale sendingaksies, maar ook op plaaslike vlak. Die seer op ons voorstoep raak al hoe groter en sal ons graag ook meer hier wil betrokke raak.

Soos alle gemeentes, is ook Overkruin afhanklik vir Sy voortbestaan van finansies. Die verantwoordelike bestuur daarvan en in vertroue leef dat God voorsien, maak die uitdagings minder. Elke lidmaat se bydrae word opreg waardeer!

Kommunikasie het as een punt uitgestaan wat werk nodig het. Daar is talle planne en idees bespreek, so hou die spasie dop.

Die Gemeenteraad het tot die slotsom gekom dat alhoewel ons dankbaar is vir 'n funksioneerende kerk, ons nie op ons louere kan rus nie, want daar is nog op talle gebiede werk wat gedoen moet word. In dit alles mag ons nie vergeet dat die Gemeente Christus gesentreerd en afhanklik van God moet leef nie.

GROOT
LYDENSWEEK
2024

Refleksies



Aswoensdag is die inleiding tot Lydenstyd, die tyd wat ons saam met Jesus op sy lydensweg beweeg na die kruis. Lydenstyd bereik sy hoogtepunte met die Groot Lydensweek. Hierdie tyd handel oor Jesus se laaste week in Jerusalem, wat begin met Sy intog, opbou tot Sy kruisdood en afsluit met Sy opstanding.

24 Mrt. 2024 om 9:00 – Jesus se intog in Jerusalem (Palmsondag)

25 Mrt. 2024 om 19:00 – Wil jy deel hê aan Sy genade?

26 Mrt. 2024 om 19:00 – Wil jy Hom volg?

27 Mrt. 2024 om 19:00 – Wil jy gesond word?

28 Mrt. 2024 om 19:00 – Wil jy gereinig word? (Nagmaal)

29 Mrt. 2024 om 7:00 – Wil jy Sy liefde beleef? (Kruistog)



Ons hou weer Markdag op 1 Junie 2024!

Daar gaan allerlei dinge wees onder andere:

Hamburgers, boereworsrolle, *chips*, kerrie-en-rys, koeke, terte, beskuit, kleingebak, nagereg, koekversierkompetisie, springkastele en nog meer.

Ons verhuur ook stalletjies. Aansoekvorms is beskikbaar by die kerkkantoor.

Skenkings en hulp sal waardeer word. Hou asseblief die Aankondigings dop om te sien waar daar 'n behoeft is.

Padkafee

Op 'n gereelde basis, gewoonlik op die laaste Vrydag van elke maand, is daar 'n Padkafee op die kerkterrein waartydens daar wegneemtes soos hamburgers en skyfies, worsbroodjies en pannekoek verkoop word. Dié word gewoonlik tydens die wintermaande effens aangepas.


Buite dat dit die kosmaaktaak op die dae vergemaklik vir almal wat etes kom koop, bied dit ook die geleentheid om sosiaal en op 'n ontspanne manier met jou geliefdes en mede-lidmate te kuier om mekaar sodoende beter te leer ken. Jesus en sy dissipels, die apostels en die lede van die eerste gemeentes het dikwels om 'n etenstafel gekuier en so 'n band met mekaar gebou.

Die span wat sorg dat die geleenthede sonder probleem verloop, of dit nou aankope, vure aansteek, verkope, braai of bak is, verdien 'n woord van dank asook gelukwensing met die werk wat hulle doen in die Gemeente.

Ons nooi elkeen uit om die verkope te ondersteun, saam te kom kuier en ook hulp aan te bied. Dis voorwaar 'n gesellige, saamwees- en saamkuiergeleentheid wat nie misgeloop moet word nie.



Die dames is hard aan die werk om almal van kos te voorsien.





Blinkoog kinders, laggende jongmense – dis wat ons Sondae begroet! Die Geloofsontwikkeling het hierdie jaar op 'n hoë noot afgeskop en ons is so dankbaar vir elkeen se inkoop in die proses. Dit is bemoedigend om te sien dat meer kinders en jongmense inskakel. Die programme wat die verskillende groepe gebruik, is goed ontvang en veral die jonger kinders geniet hul boeke baie. Dankie aan elke ouer wat 'n geestelike pad saam met hul kinders stap en dit vir die mentors moontlik maak om Sondae tyd saam met die kinders rondom God se Woord te spandeer. Kom loer gerus by een van die groepe in en beleef die kinders se opgewondenheid!



My duimafdruk is net my eie. God het my 100% uniek gemaak—ek is pragtig en spesiaal. Genesis 1:27.

Dankie!



Huis Judea in Wolmers se kinders sê dankie aan NG Overkruin vir die ondersteuning wat aan hulle gebied word.

Doop in Engels



Renaldo en Elizabeth Scheepers asook ander familielede met die doop van klein Renaldo.

Renaldo, die seuntjie van Renaldo en Elizabeth Scheepers, is op 3 Desember 2023 deur ds. Heinrich Stapelberg in Engels gedoop.

Gemaklik, asof dit 'n alledaagse gebeurtenis was, het ds. Stapelberg ter wille van klein Renaldo se moeder Elizabeth, na Engels oorgeslaan en die doopformulier en verrigtinge hanteer.

Is dit dalk 'n historiese eerste vir NG Overkruin? Hoe wonderlik om te weet dat die almagtige Here wat ons aanbid, nie beperk is tot enige wêreltaal nie en ons altyd hoor en verstaan.

Geloofsbelofte

Vir die Heymans-gesin, familie en vriende sal twee grootse oomblikke lank onthou word. Barend Heymans het op 26 November 2023 en Claudette Heymans op 7 Januarie 2024, belydenis van geloof onder leiding van ds. Willie Rothmann afgelê.

As Gemeente, wens ons Barend en Claudette hartlik geluk met hierdie groot stap en verwelkom hulle in die geloofs familie van NG Overkruin. Mag hulle in hierdie geledere warmte en vriendskap ervaar wat vir altyd 'n sterk eenheid- en geloofsband sal vestig.

EK WIL LEWE TOT EK DOODGAAN

Dr. Henk Gous, leraar van die NG Gemeente Quellerina, Roodepoort, was die gasspreker by die kwartaalbyeenkoms van die Seniorvolwassenebediening op 9 Maart 2024 by NG Overkruin.

Die tema van sy voordrag was: *Ek wil lewe tot ek doodgaan: Positiwe denke en gewoontes wanneer ek ouer word.*

Dr. Gous het gesê sekere faktore en realiteit bepaal wel hoe oud mens gaan word – en oud word is 'n feit. Hoe ons daarna kyk, maak egter die verskil!

En hoe moet ons na oud word kyk?

- Wees positief – kweek lewensvreugde.
- Stel 'n dankbaarheidslys op.
- Pak iets aan wat jy nie voorheen gedoen het nie.
- Stimuleer jou brein.
- Leef jou emmerskop-lys.
- Aftrede is 'n moeilike oorgang – maar jy moet steeds doelwitte hê.
- Behou jou gesondheid – wees aktief.
- Neem besluite wat vir jou gesond is, byvoorbeeld waar jy gaan woon.
- Berei jou voor vir jou dood – stel 'n lewende testament op, reël jou begrafnis.

Ons moet nie ophou LEWE vóór ons sterfdag nie!

Finansies


Die COVID-pandemie het baie gemeentes finansieel laat steier en ons Gemeente is nie heeltemal immuun gelaat deur die impak van die pandemie nie. Ons was egter gelukkig om nog steeds al ons verpligtinge na te kom. Dit was vir almal 'n blye dag toe ons weer die kerkdeure kon oopgooi en almal weer terug verwelkom.

Met dankbare harte kan ons meld dat ons weer kon begin met groter werk as gevolg van bydraes wat ontvang is. Gedurende die 2023/24 boekjaar kon die orrel 'n groot instandhoudingsdiens kry en ons kon ook noodsaaklike werk aan die pastorie doen. Dit was ook vir ons moontlik om al die aksies wat deur die Gemeente bedryf word uit te voer, en sodende moedeloze harte aan te raak met die hoop wat net van God af kom. Ons glo en vertrou dat ons die komende jaar weer 'n groot bydrae sal kan lewer tot ons Gemeente en ook groter gemeenskap deur die verskillende aksies.

By die kerk beplan ons om binnekort die matte en vloerbedekkings in die kerk, kerkkantoor en saal te herstel en te vervang. Al die dinge kan ons net doen omdat ons 'n gemeente met gehoorsame harte het, wat gee en ons vertrou met die bydraes wat gegee word. 'n Groot dankie aan elkeen se bydrae wat dit vir ons moontlik maak om 'n gehoorsame Gemeente te kan wees sodat ons God se werk op aarde kan uitvoer.

Aksiegroep: Uitreik

Op 3 Maart 2024 het Hein Schuld, die voorsitter van Aksiegroep Uitreik, breedvoerig terugvoering en toelingting gegee ten opsigte van die talryke instansies waarby NG Overkruin deur middel van die Uitreik-span, noodleniging verleen in die uitvoering van die Gemeente se missionale doelwitte. Die Gemeenteraad het, onder andere, ook goedkeuring gegee dat finansiële ondersteuning aan die Oekraïne-, Mosambiek- en Jerusalem-uitreik bewillig word.



Hein Schuld gee terugvoering aan die gemeente t.o.v. die Uitreik-aksies waarby ons betrokke is.